

# Emprima badigliada per la sedia da la BCG Tavau Plaz

**Cuira, ils 24 d'avrigl 2019 – La Banca Chantunala Grischuna (BCG) cumenza a construir sia nova sedia regiunala a Tavau Plaz. L'edifizi vegn a cumpigliar er abitaziuns, localitads per butias ed affars ed ina chasa da parcar e duai daventar in lieu d'inscunter da la vischnanca. L'emprima badigliada è vegnida fatga tenor plan ils 24 d'avrigl 2019 en preschientscha da la publicitad e da las medias.**

Cun l'emprima badigliada ils 24 d'avrigl 2019 ha la BCG sco investidra e patruna fatg l'entschatta festiva da las lavurs da construcziun da sia nova sedia regiunala a Tavau Plaz. Tarzisius Caviezel, mastral da la vischnanca da Tavau, Urs Meng, architect e manader da project dal biro D. Jüngling ed A. Hagmann, Enrico Lardelli, manader IT/Operations e commember da direcziun da la BCG sco era Christian Meuli, manader BCG regiun Tavau Claustra, han infurmà davart il project da construcziun, sia significaziun per la regiun da Tavau e la collavuraziun cun tut ils partenaris.

«Nus avain grond plaschair da pudair cumenzar ussa suenter dus onns da concepziun, planisaziun, votaziuns e lubientschas», declera Enrico Lardelli. Christian Meuli cumplettescha: «Nus construim a Tavau ina banca moderna tenor ils basegns dal temp per servir nossa clientella a moda cumpetenta e speditiva ed en in'atmosfera empernaivla». Il svilup digital ha per consequenza che servetschs al spurtegl vegnan dumandads adina pli pauc. La BCG suonda quest trend cun ses nov concept da filialas senza spurtegl classic. «Cun quest pass colliain nus la finamira dad evitar transacziuns senza plivalur. Las resursas che vegnan libras impundain nus per cussegljar nossas clientas e noss clients», cuntinuescha Meuli.

### **Preschientscha da la BCG a Tavau Plaz**

Durant las lavurs da construcziun vegn la filiala da la BCG a Tavau Vitg utilisada sco alternativa. Sia infrastruttura è vegnida adattada ed ella è puspè averta l'entir di. Per che la BCG saja tuttina preschenta er a Tavau Plaz, ha ella installà in bancomat a la Promenada 57 visavi il Hotel Morosani Schweizerhof per pajar en e retrair daners.

### **Ina plivalur per la vischnanca e la banca**

Il mastral Tarzisius Caviezel sustegna e stima la collavuraziun cun la BCG e vesa ina plivalur per la vischnanca da Tavau. Cun la nova Piazza da las Arcadas giaja en vigur in grond giavisch per ina zona d'inscunter publica a Tavau Plaz. L'investiziun da la BCG en la regiun da Tavau va sco in fil cotschen tras l'entir project da construcziun. Enrico Lardelli, commember da direcziun da la BCG, accentuescha: «Nus n'investin betg mo en nossa banca, mabain er en spazi d'abitar e localitads per il commerzi. Uschia mussain nus nossa attaschadadad a Tavau sco lieu turistic ed a sia populaziun.»

### Localitads per il commerzi, spazi da viver, abitaziuns e chasa da parcar

Urs Meng, architect e manader da project dal biro D. Jüngling ed A. Hagmann, Cuira, ha infurmà davart la construcziun nova a l'orientaziun da las medias a chaschun da l'emprima badigliada: «L'edifizi vegn ad integrar ultra da las localitads da la BCG trais locals da butias en las arcadas e 19 abitaziuns affittadas en las etaschas superiuras. A medem temp concepescha la vischnanca la Piazza da las Arcadas da nov sco piazza centrala». Quella duai puspè survegnir ses intent oriund sco spazi d'inscunter urban. Ils parcadis dad oz vegnan puspè mess a disposiziun a la publicitad en ina garascha sutterrana da l'edifizi nov. Per ils locataris da las abitaziuns e per la clientella da la BCG vegni a dar parcadis avunda en ina garascha sutterrana separada.

### L'ulteriur proceder

La BCG planisescha da terminar la construcziun criva per la fin dal 2020. Suenten cumenzan las lavurs internas. L'utilisaziun da las localitads ed abitaziuns è prevista per la fin dal 2021. Tgi che vul, po perseguitar il progress dal project sin [arkaden.gkb.ch](http://arkaden.gkb.ch).

### Contact per ils collavuratur da medias:

Banca Chantunala Grischuna, Medias & Investor Relations, chascha postala, 7001 Cuira  
 Thomas Müller, [thom.mueller@gkb.ch](mailto:thom.mueller@gkb.ch), telefon +41 81 256 83 11  
 Plutarch Chiotopulos, [plutarch.chiotopulos@gkb.ch](mailto:plutarch.chiotopulos@gkb.ch), telefon +41 81 256 83 13

La Banca Chantunala Grischuna sin:

[gkb.ch/medien](http://gkb.ch/medien) | [Twitter](#) | [Facebook](#) | [YouTube](#) | [Flickr](#) | [Xing](#)

---

#### Banca Chantunala Grischuna – il leader en il Grischun

La Banca Chantunala Grischuna porscha tut quai ch'i dovra per ina banca universala moderna – per persunas privatas, l'economia ed il maun public. La banca occupa 1'009 collavuraturas e collavuratur (stadi dals 31.12.2018). En il chantun Grischun cun sias numerusas vals e pliras linguas, è l'interpresa represchentada cun 52 agenturas, la sedia principala sa chatta a Cuira. La Banca Chantunala Grischuna è participada a la Banca Privata Bellerive SA a Turitg ed a la Albin Kistler SA a Turitg. En il resultat annual preschenta ella cun ina summa da bilantscha da CHF 26.5 milliardas in gudogn dal concern da CHF 185,1 milliuns. Il scrit da participaziun BCG è quotà a la bursa dapi ils 10 da settember 1985.

#### Termins

Radunanza dals participants:	4 da matg 2019
Rendaquint semestral 2019:	25 da fanadur 2019

---